

Eduardo de Veer:

MetaCorp preparando pa celebra 100 aña di existencia na 2020



ORANJESTAD (AAN) – Presidente Comisario di MetaCorp, Eduardo de Veer, a hiba palabra durante un encuentro cu prensa, den presencia di su colega, en conexion cu e preparacion di edi 100 aniversario di MetaCorp, na 2020.

Sr. de Veer a menciona cu e mes a cuminsa cu e compania na aña 1964. El a duna un relato di e principio di e compania. El a conta cu su welo Eddy de Veer, a cambia un pianola cu su casa, si wela Irma de Veer, pa un proyecto di 35 milimeter di cine mudo cu sr. Henriquez tabata tin.

Asina el a cuminsa proyecta e prome pelicula den cura di loke awendia ta Censo, y cu tabata "Pasion di Cristo". Sr. de Veer a menciona cu e hendenan cu a yuda e tempo ey, fuera di su welo, tabata Dan Dan Kock, como proyector y Captain Beaujon cu tabata traha na waf di e tempo ey, ken a yuda pa pone un generator door di un auto pa genera coriente pa e proyector. Asina a cuminsa e empresa na un forma humilde y chikito. Di eynan el a muda poco

despues, pa un teatro formal cu tabata yama Gloria, situa na Steenweg.

Durante e siguiente añan te na segundo guerra mundial tabata tin teatro den casi tur distrito, viniendo for di Lago Esso Club te pabao, tabata tin Esso Club theater, Lago High Theater, Cinelandia, Principal na San Nicolas, Teatro Savaneta banda di Mariniers Kazerne, bay rumbo Santa Cruz tabata tin Teatro Aurora, y viniendo Playa tabata tin Gloria, de Veer Theater, Eagle Club Theater den e refineria di Eagle, y señor Tuyo Arends a traha un cine tambe na Steenweg cu a yama Realty, pero den menos di un aña el a bende. E ora ey e welo di sr. de Veer, a adkiri e teatro. No tabata tin mucho pa haci na Aruba. Na aña 1920 e poblacion di Aruba tabata 9 mil ciudadano.

De Veer a relata cu e compania a sigui expande, Lago a bin, a bay riba terreno di transportacion di cosnan di e refineria pa waf, y despues di e di dos guerra mundial sr. Vic Pinedo tabata tin un planta di coca cola, cu el a bende cu sr. de Veer su welo. E planta

tabata produci 10 boter pa minuut. Awo esun di bleki so, tin tres planta cu ta produci 100 bleki pa minuut. Pero e tabata otro tempo, otro situacion. E tempo aya tabata piki e boternan y den un cashi di palo tabata pone e refresconan. Eduardo de Veer a menciona cu e compania a pasa den tempo bon y den tempo malo, pero apesar di tur cos, e ceramento di Lago, e temporada di video cassettes, pero nan a lanta bek y sigui crece.

E compania tin un trayectoria largo y semper famia de Veer ta percura pa ta corecto y cumpli cu tur e reglanan y percura pa tin empleo pa nos hendenan. Asina sr. de Veer a subraya.

No solamente ta trata di un negoshi pa haci ganashi, pero mester tin un impacto

economico y social riba e pais.

No solamente nan tin accionista pero empleadonan tambe; empresanan cu ta bende e compania nan servicionan, of ta bende nan producto. Banconan cu ta duna nan fianza, y tur tin beland den un empresa cu ta stabil y cu por cumpli cu su obligacionnan, sin haya su mes cu un debe cu no por wordo paga, of un cliente malcontento pa cualkier motibo. Esaki ta un empresa cu ta bay mas leu cu simplemente inverti pa haya rendimiento, un ganashi riba su inversion.